

## 6

### Von den Turm tau Babel

#### 1. Mose 11

**A**s dat nu so nah un nah wedder mehr Minschen worden wärn, dor können sei sick in dei Gegend, wo Noah sien Kasten stahn bläben is, nich mehr hollen.

Dor wär nich Acker naug för dor, dat sei all Nahrung finn' können. Sei treckten dorüm weg un kemen in ein äben un flaches Land. Un nah so mänich hunnert John kregen sei den Kopp all wedder in den Nacken gegen unsen Herr'e Gott.

Ein grot Stadt wollen sei sick bugen. Un mirrn in de Stadt so 'n Turm, dei mit de Spitz bet an den' Himmel reckt. Un sei füngen dor denn ok gliek mit an: Weck mößten de Muerstein maken, annern muerten, un dei weck wärn Handlangers. So kemen sei mit ehr Arbeit ok fix vöran. Un dei Turm wär all hoch, dat 'e bet in de Wulken güng. Dor is jo süss gor nicks bi, so 'n grot Buwark uptauführn. Man den leiwen Gott künn 't gor nich gefallen, denn sei wärn mit ehr grot Vörhaben up ut, em Trotz to beiden. Sei wolen sien Wort, wat hei tau Adam un Eva un ok tau Noah all seggt har, dat wolen sei dor ümstöten mit. Un so lästerten sei ümmertau updal! "Hei dor baben hett woll seggt: "Füllet die Erde! Oewer wi sünd doch kein Bängenbüxen nich. Wo wi hier gegen em tauhop stahn, denn kann uns keiner wat. Un wo mal weck von uns würllich woanners hentrecken, dor hebben sei in ditten Turm ümmer dei rechte Mird un weiten genau, wo sei henhörn." Nee, dit künn de leiw Gott sick nich beiden laten, un hei kem ehr mit grot Unwäder, mit Blitz un Dunnerwetter man so Slag up Slag - wol sick dei Stadt ehrn nieten Turm doch ok ens von dicht bi beseihn...!

Dunn kregen 't disse Lüd äwer doch mit de Angst to daun un löpen all ut'nanner; de ein' hier hen, de annern dor hen. Un so wär mit mal dat grote Bugen vörbi. Un is ok nich wedder anfungen worden, denn Gott har ehr all 'ne anner Sprak gäben. Wenn de ein "witt" säd, verstünn' de anner "swart", un wat bi den ein' "hüh" wär, dat meinte bi den annern "hott".

Von den Turm oewer un dei Stadt, de den Namen "Babel" krägen, is hüt man noch 'n groten Schotthümpel von to seihn.